

Nama Reti Pengidup?

BAGI KE SATU

1. Pemungkal Jaku

- a) Reti pengidup tu meri penerang pasal tanya ti bekenang ka *tuju* tauka *kebuah* enggau *guna* pengidup ti bisi dipeda nyengala nyadi. ‘Konsep’ pengidup tu meri mayuh macham penerang, baka; “Nama kebuah kitai bisi ditu?”, “Nama reti pengidup tu ti bendar?”, enggau “Nama reti semua iya nya?” Pengidup tu endang selalu nyadi ka buah kenang (suah dikejaku), baik ka nya ngena penemu sains, ngena jalai pengarap enggau ngena runding mensia ti bisi penemu dalam (pandai), ba sepemanjai umur mensia ti nguan dunya tu. Mayuh chara pansik ngena peneleba (pengasai pengidup), ari ulah enggau ari gaya pendiau genap iku mensia (teori) ti idup ti udah nyadi ari dulu menya sampai ka saritu. Sekeda pansik dipelajar ka ari pengidup pupu raban bansa ba dunya tu ti bepanggai ba penemu ti tau dikarap (idealoji) sida siku-siku.
- b) Reti pengidup suah agi ditusoi tauka dikenang ngena konsep pengarap (agama) dipegulai ka enggau chara runding tauka pelajar mensia ti bisi penemu dalam (baka penemu saintis). Sida iya berati ka asal penatai, kaul raban bansa, pemereti ati dalam semua utai sereta pengelantang pengidup enggau mayuh bengkah pengawa ti bukai, baka reti kelai (simbol), pun penatai mensia, gaya mensia ti idup, tuju idup, perangai tauka ulah, utai ti manah enggau ti jai, peneka siku-siku, konsep Tuhan ba penemu siku-siku, bakani Tuhan tau bisi, pasal roh (samengat) enggau pengidup ti udah mati. Penemu sains meri penerang ti mayuh agi ngena penemu pansik enggau uji (eksperimen) pasal dunya enggau semua utai ti ngelinggi iya.
- c) Nama reti pengidup? Tanya bakatu enda ulih diterang ka ngena chara enggau ulah mensia ti ngidup ka diri tauka enda ulih dipejurai ka ngena chara runding dunya. Laban nya nadai ulih meri penerang ti silik sereta mudah amat ngasuh ati kitai agi kakang. Tu meh sebengkah ‘dilema’ pengidup, ianya runding ti agi apin bisi pengadang ti penuh pasal pendiau ka enda tau enda ditemu kitai mensia ti agi idup ba dunya tu. Uji kitai sama berati ka sekeda penerang pasal pendiau mensia ti semina ngemansang ka diri empu, tang nadai nyengala tuju pengidup ti amat ulih madah ka utai ti bendar;
 - i. Mensia udah diau ba dunya tu turun-menurun, serak siti ngagai serak siti. Mayuh kitai idup ngembuan pengarap nitih ka peneka diri empu, e.g. Kristian, Budhha, Islam, Hindu enggau bepetara ka roh ba dunya tu.
 - ii. Bala saintis mansik pasal pengidup tu ari taun ka taun. Pengarang jerita nusoi pasal reti pengidup ngena pengelandik sida ngena lagu, pantun, pelandai, jerita lama, ensera enggau leka renong (kitai iban ngena leka renong enggau ensera).
 - iii. Pengidup anembiak rebak baru diatu nyau limpang ari jalai adat enggau basa bansa diri, ketegal deka ngiga pengidup nitih ka peneka sida empu. Sida iya terunda-runda nitih ka pemansang teknologi pemadah ti baru diatu, ti amat udah maju.
 - iv. Orang ka buban bulu pala (orang ka udah tuai) agi mengkang ngena adat asal diri empu, meri ajar nitih ka peneleba (pengelaman) sida dikena ngajar sida ka agi biak ngambi ka ulih mereti bakani tau ngidup kadiri, awak ka enda tusah.

Nama Reti Pengidup?

Tang jaku ajar nya semina penemu dunya aja, lalu nadai meri sida pengadang, enti sida udah mati jemah ila.

- v. Pengidup ba dunya tu endang amat nyenggala tauka nyata, nadai siku kitai ulih nyangkal pengidup ba dunya tu endang amat bisi. Kitai mensia idup, enseput, makai, tindak, bejalai, nyabak, gaga, tusah ati, bira kemi, ringat, rindu, belaya, besulu enggau mayuh agi ka bukai, tang mayuh kitai enda mereti nama tuju kitai idup, ti ngujong ka kitai **enda nemu reti puas**.

2. Ngelala Reti Pengidup

Sebedau kitai belajar ka pasal nama reti pengidup enggau dalam agi, uji kitai sama berati ka tanya dibaruh ditu;

- i. Ari ni penatai kitai mensia?
- ii. Sapa ti ngaga kitai mensia?
- iii. Nama tuju/kebuah kitai mensia digaga?
- iv. Nama reti / tuju / kebuah kitai idup ba dunya tu?
- v. Nama pengujung pengidup udah kitai mati? Kini ka penunga semangat (roh) udah tuboh mati, agi segau-segau, masuk neraka tauka serega?
- vi. Patut ka enda kitai mensia ngiga pengeraja, penyenang enggau pemandai?
- vii. Nama kebuah kitai mensia enda tau enda bekereja ka Allah Taala ti Pengaga semua utai sereta bebasa ka IYA?

Semua saut di atas nya bisi ba dalam Bup Kudus magang!

Bakani kitai tau nemu reti PENGIDUP? Ngelala pengidup ti bendar semina tau ditemu ulih kitai ari ti macha Bup Kudus sereta arap ka Tuhan Jesus Kristus aja! Pengidup ti bendar endang semina bepun ari Iya siku aja. Nama kebuah bakanya?

“Jaku (Jesus) nya pun pengidup, lalu pengidup nya mai penampak ngagai mensia” (John 1:4). “Kitai nemu Anak Allah Taala udah datai lalu udah meri ka kitai pemereti ati, awak ka kitai nemu IYA ti bendar, lalu kitai dalam IYA ti bendar, dalam Anak IYA Jesus Kristus. Tu meh Allah Taala ti bendar, lalu tu meh pengidup ti meruan,” (1 John 5:20).

Sapa ti ngelala (nemu) sereta arap ka Krsitus, nya meh reti pengidup.

3. Jaku Kenang Pasal Pengidup Ba Dunya Tu.

“²Nadai reti, nadai reti,” ko iya ti bejaku. “Amat nadai reti, semua endang nadai reti (nadai guna - nadai tuju, semua ngasuh lebu).³Nama utai ulih sekumbang mensia ti gawa, bekereja bebendar di baruh matapanas?⁴Mati serak siti ganti serak siti, tang dunya tu mengkang enda berubah.⁵Matahari (matapanas) mengkang tau tumbuh enggau padam, lalu pulai ngagai endur iya ti pansut baru.⁶Ribut bepuput ka selatan, lalu bepusin ka utara, iya beputar kin kia pulai baru enda ngetu.⁷Semua sungai anyut ka tasik, tang tasik enda penuh. Ngagai endur alai pun penatai sungai, kia penunga iya (ai sungai) pulai baru.⁸Semua utai ngasuh lelak, enda ulih dikenang. Mata enda nemu puas meda utai, bakanya mega pending ti ninga enda nemu puas.” (Pengajar 1:2-8).

- ☞ Tu meh jaku Pengajar, anak David, ti nyadi rajah di Jerusalem (ianya Rajah Solomon). Iya deka ka kitai mereti ka pengelantang enggau pengeraja ba dunya tu enda ulih tan lama, sereta nadai reti, semua ngasuh asa enggau lebu. Ulih nya Rajah David, madah ka sapa kitai mensia tu ti bendar. *“¹⁴IYA nemu ari ni kitai digaga, IYA ingat ka kitai endang datai ari abu tanah.¹⁵Nyadi mensia umur iya baka rumput, iya mansang*

Nama Reti Pengidup?

sereta galak baka bungai ti ba padang. ¹⁶Iya dipuput ka ribut, udah nya iya nadai agi, lalu endur iya nadai dikingat ka agi.” (Masmor 103:14-16).

Ba timpuh ti deka datai, ti endang di-adang, semua utai ulih (pemandai, pengaya enggau penyamai) kitai di dunya tu, deka lenyau magang. Anang kelalu balat andal enggau semua utai (pengeraja, pemandai & penyamai) ti dikembuan ba dunya tu, laban nya enda tan belama iya. Utai tu ti ko Rajah Solomon ianya, semua pengaya enggau penyamai di dunya tu endang pemadu nadai reti. Pengidup ti bisi reti enggau enda ngasuh kitai lebu, semina enti kitai nitih ka peneka Allah Taala, nya aja ti ulih meri kitai PUAS. Nya alai dalam semua pengawa; utai disebut, utai digaga enggau utai diperunding kitai, ianya enda tau enda bebasa ka Allah Taala. Nama kebuah bakanya? Aram meh kitai sama belajar ka nya enggau dalam agi.

Bisi tiga bengkah tanya ka patut di temu kitai mensia.

Udah abis tu peda BAGI KE DUA - [Ari Ni Asal Penatai Kitai Mensia?](#)